

IN MEMORIAM

Homenahe na Winnie Ponson

DIADOMINGO anochi ora mi a wordo informa cu Winnie Ponson a fayece, masha hopi cos a pasa den mi cabes. Hopi tristesa, pero alabes hopi gratitud di por a conoce e gran dama aki. Un bunita hende cu asina un bon curason.

Den casi tur informe tocante Aruba Hi-Winds (AHW) bo por lesa e nombrenan di Anthony Blok, yiu di Winnie y ami como e fundadornan di e magno

evento aki, locual ta berdad, pero banda di nos tabatin un cantidad di hende cu a para firme y a haci cu awe Aruba ta riba mapa mundial di e deporte acuatico di windsurf.

Un di e hendenan aki tabata Winnie Ponson. Ora cu na 1986 ami cu Anthony a lansa e idea pa bin cu un torneo internacional di Windsurf, sin ningun momento cu intencion comercial su tras, sino pa yuda nos pais

hoben, nos a wordo boycotea ya cu hopi hende no a kere den nos soño.

E tempo ey hasta un carta a bay pa nos gobernantenan den cual nos a wordo califica como “dos hoben jong, loco, cu no sa kico nan ta haci”. For di e momento ey Winnie a haci su mes e promesa pa percura p’e soño di Anthony y di mi bira realidad. Gran parti di e fondo financiero pa promove e evento den su

prome aña na 1987, a bin di Winnie. Nos a bay Hawaii pa papia cu e hueznan p’e evento aki; nos a promove Aruba Hi-Winds n’e Accion SportsWear Show na Long Beach California; nos a promove AHW tambe na Dusseldorf, Alemania y a bay cerca nos bisiñanan cu ta Venezuela, unda nos a papia na algun radio-emisora y Radio Caracol di Colombia.

Sin menciona mes tur gasto pa imprenta nos materialnan; tur esaki tambe Winnie a tuma riba su mes. Hopi anecdota y hopi harimento mi tin cu e credit cardnan di Winnie; Anthony na

telefon cu un di e hueznan di Hawaii ta bisa cu ta “no problem” pa trece e y e otronan for di Hawaii pa Aruba y Winnie ta gruña henter ora “no problem no problem paso un ta abo ta paga” turestempo cu Anthony ta na telefon.

Ora Anthony a sera, e di su Mama den chansa pa no strob’e ora e ta papia na telefon ya cu el a caba di cumpli 21 aña. Winnie a drei contest’e: “Awel, duna mi mi creditcardnan bek anto”. Anthony a guli su palabranan y e resto ta historia.

Winnie semper tabata percura pa ora mi mayornan, hendenan humilde, bin wak e competencianan na Eagle Beach, pa nan haña un bon lugar pa sinta y e tabata introduci nan na tur hende y n’e profesionalnan cu tabata competi e temponan ey, como mi mayornan y como esnan cu tambe a haci e evento aki posibel.

Tempo cu AHW a cumpli 20 y 25 aña, ami y Anthony a wordo invita pa papia. Anthony na niun dos ocacion no por a asisti, pero ami a percura pa, na tur dos biaha, menciona nos hendenan di prome ora, y Winnie en particular. Sin Winnie, AHW lo a keda un soño di “dos mucha loco cu no sa kico nan ta haci.”

Danki Winnie y cu Dios carga bo den Su Reino. Na mi amigo Anthony, casa y yiu, hopi forsa cu e perdida grandi aki. Aruba a perde un Gran Dama. Winnie sosega na paz y cuminda mi tata pa mi.

Ruben Croes, Co-fundador
Aruba Hi-Winds
Aruba, 29 di october 2012